

共同經課-1 使徒行傳八章二十六節~四十節

26 主 ê 天使 tùi 腓力講，起來，tùi 南勢去，到 tùi 耶路撒冷落去 Ka-sat ê 路；hia 就是曠野。27 就起來去；tú-tng 有一個 Ai-thê-o-pek 人，就是 Ai-thê-o-pek 女王，Kan-tāi-ki，有權 ê 太監，總管伊 ê 銀庫；伊已經到耶路撒冷敬拜；28 tò-tng 來，坐 tī 車裡，teh 讀先知以賽亞 ê 冊。29 聖神 kā 腓力講，進前去近 oá hit 張車。30 腓力走去就近伊，聽見伊 teh 讀先知以賽亞 ê 冊，就講，你所讀 ê，你會明白 mah？31 伊講，無人指示我，thái-thó 話？就請腓力上車 saⁿ-kap 坐。32 所讀 ê 聖經就是 chit 段，伊 hō 人牽，親像羊到受 thài ê 所在，伊無開嘴，親像羊 á tùi 煎毛 ê 無出聲；33 伊卑微 ê 時，受無公義 ê 審判。伊 ê 世代 chī-chūi beh 傳述？因為伊 ê 活命 tùi 地上受奪去。34 太監應腓力講，請問，先知講 chit-ê 話是指甚麼人？是指本身，á 是別人 ah？35 腓力就開嘴，tùi chit-ê 聖經起，用耶穌傳 hō 伊。36 行路 ê 時，到有水 ê 位；太監講，你看，chia 有水；我受洗禮有甚麼阻礙？37b 38 就吩咐停車；腓力 kap 太監兩人落水；腓力就 kā 伊行洗禮。39 Tùi 水裡上來 ê 時，主 ê 神帶腓力去；太監無 koh 看見伊，因為做伊上路，也真歡喜。40 後來腓力 tī A-só-to hō 人 tú-tiòh；就遍行 chiah-ê 城傳福音，直到該撒利亞。

共同經課-2 詩篇二十二篇二十五節~三十一節

25 我 tī 大聚會 ê 中間所 o-ló-ê，是 tùi 你來；我 beh tī 驚畏伊 ê 人 ê 面前，謝我 ê 願。26 謙卑 ê 人 beh 得 tiòh 食飽；Chhē 耶和華 ê 人 beh o-ló 伊；願 lín ê 心活到永遠。27 地 ê 極頭 lóng beh siàu 念，來歸順耶和華；列邦 ê 萬族 lóng beh 敬拜 tī 你 ê 面前。28 因為國是耶和華 ê；伊是萬國 ê 主宰。29 地上一切好漢 ê 人 beh lim 食來敬拜；見若歸土 ê 人，boē 能保全性命 ê，lóng beh 仆拜 tī 祂 ê 面前。30 有後裔 beh 服事伊；主 ê tāi-chi beh 傳 tī 後代。31 In beh 來，亦 beh 傳伊 ê 公義，Hhou7 得 beh 出世 ê 百姓知 chit-ê 事是伊做 ê。

共同經課-3 約翰壹書四章七節~二十一節

7 所疼 ê 兄弟 ah，咱 tiòh 相疼；因為疼是 tùi 上帝來；見若疼 ê 是 tùi 上帝生，koh bat 上帝。8 無疼 ê m̄-bat 上帝；因為上帝是疼。9 上帝差伊獨生 ê kiáⁿ 入世間，hō 咱 tùi 伊來活，上帝 ê 疼 tùi chit-ê 顯明 tī 咱。10 m̄ 是咱 bat 疼上帝，是伊 bat 疼咱，差伊 ê kiáⁿ 為 tiòh 咱 ê 罪做挽回 ê 祭，疼就是在 tī chit-ê ê。11 所疼 ê 兄弟 ah，上帝若疼咱到 án-ni，就咱也 tiòh 相疼。12 從來未有人看見上帝；咱若相疼，就上帝 tiàm tī 咱，也伊 ê 疼完全 tī 咱。13 伊已經用伊 ê 神賞賜咱，咱 tùi án-ni 知咱 tiàm tī 伊，也伊 tiàm tī 咱。14 父棲差伊 ê kiáⁿ 做世間 ê 救主，阮 bat 看見，也做干證。15 見若認耶穌做上帝 ê Kiáⁿ ê，就上帝 tiàm tī 伊，伊也 tiàm tī 上帝。16 上帝所有疼咱 ê，咱也知也信。上帝就是疼；koh 人 tiàm tī 疼，就是 tiàm tī 上帝，上帝也 tiàm tī 伊。17 Tùi án-ni 疼成做完全 tī 咱，hō 咱 tī 審判 ê 日能好膽；因為伊甚麼款，咱 tī 世間也 án-ni。18 Tī 疼 ê 內面無驚惶；獨獨齊全 ê 疼趕出驚惶；因為驚惶就有刑罰；見若驚惶 ê，tī 疼未有齊全。19 咱有疼，因為伊事先疼咱。20 若有人講，我疼上帝，也怨恨伊 ê 兄弟，就是白賊 ê；因為無疼所有看見 ê 兄弟 ê，就 boē 疼所 boē 看見 ê 上帝。21 疼上帝 ê 也 tiòh 疼伊 ê 兄弟，這是咱 tùi 伊所受 ê 命令。

共同經課-4 約翰福音十五章一節~八節

1 我是真 ê 葡萄樹，我 ê 父是作園 ê 人。2 見若連 tī 我 ê 枝無結果子 ê，伊就刪起來；見若結果子 ê，伊就修 hō 伊清氣，hō 伊結果子 koh-khah choē。3 Taⁿ lín 因為我所 kā lín 講 ê 道理已經清氣 lah。4 Lín tiòh tiàm-tī 我，我亦 tiàm-tī lín；設使枝無連 tī 葡萄樹，就 boē 能家已結果子；lín 若無 tiàm-tī 我，亦是 án-ni。5 我就是葡萄樹，lín 就是枝；tiàm-tī 我，也我 tiàm-tī 伊 ê，就結果子 choē-choē；因為 kap 我相離，lín 就 boē 做甚麼。6 人若無 tiàm-tī 我，就受棄 sak tī 外面，親像枝，續枯焦；人拾 inhiat 落火，就燒去。7 Lín 若 tiàm-tī 我，我 ê 話 tiàm-tī lín，凡若所 ài ê lín tiòh 求，就 beh kā lín 成。8 Lín 結果子 choē-choē，tùi án-ni，我 ê 父得 tiòh 榮光；亦 lín beh 成做我 ê 學生。